

Velikom tetrijebu još veća pažnja

Imajući u vidu brojnost neprijatelja koji su na putu opstanka velikog tetrijeba od kojih čovjek svojim nemarom prema njemu zauzima prvo mjesto i nedovoljna briga i pažnja koju ženka tetrijeba posvećuje svojim mladim, nameće se potreba da se obilježi biotop velikog tetrijeba u kome bi se stvorili svi preduslovi za njegov boravak i produžetak vrste

Piše: Sakib Kljajić

Već duže vrijeme pratim problematiku zaštite velikog tetrijeba ne samo u našem "Lovačkom listu" nego i u drugoj lovačkoj literaturi koja se odnosi na ovu oblast, te sa žaljenjem konstatujem da pojedini pokušaji koji imaju cilj da definišu osnove prioriteta djelovanja u zaštiti i očuvanju velikog tetrijeba polaze sa pogrešnih pretpostavki.

Kao primjer konačnog definisanja prioriteta djelovanja može se navesti dramatična situacija po očuvanje populacije velikog tetrijeba na prostorima BiH, ističem članak u "Lovačkom listu", broj 15/16, pod naslovom "Velikom tetrijebu, velika pažnja", koji, ustvari, rezimira diskusije oko dvadesetak naučnih radnika i eksperata na interdisciplinarnoj konferenciji od 7. do 9. septembra protekle godine u Fojnici o temi "Održivi razvoj prirodnih i humanih resursa u BiH".

Na osnovu mojih dosadašnjih saznanja o velikom tetrijebu, čija je populacija u ranijem periodu bila u znatnoj mjeri izražena na vrhovima planine Smolin, gdje sam proveo dobar dio svoje mladosti, mišljenja sam da je ekstenzivan način stočarenja u vrijeme parenja i ležanja velikog tetrijeba jedan od glavnih razloga izumiranja ove vrste.

Navodim jedan događaj iz svoje rane mladosti kada sam čuvajući ovce na Smolinu uočio da je stado ispred sebe poplašilo tetrijebovu ženku sa legla u

kome je bilo 13 jaja. Da stvar bude još gora, čobani su potom porazbijali sva jaja žaleći, pri tome, što i ženku nisu uhvatili. Slušajući stare lovce sa tog prostora imao sam priliku čuti i podatak da je u ranijem periodu, kada je brojnost tetrijeba na Smolinu bila optimalna, nerijetko dolazilo do pustošenja tetrijebovih jaja od kojih se spremao čimbur.

Štete takvog ponašanja u

krajnjem slučaju za posljedicu imaju nestanak tetrijeba sa mnogih ranijih pjevališta kao što su Crni vrh, Matina kosa, Kabuni, Kruščić i druga.

Imajući u vidu brojnost neprijatelja koji su na putu opstanka velikog tetrijeba od kojih čovjek svojim nemarom prema njemu zauzima prvo mjesto i nedovoljna briga i pažnja koju ženka tetrijeba posvećuje svojim mladim, nameće se potreba da se obilježi biotop velikog tetrijeba u kome bi se stvorili svi preduslovi za njegov boravak i produžetak vrste.

Drugi razlog nestanka velikog tetrijeba je neprimjerena i prekomjerna eksploatacija šuma u vrijeme njegovog parenja koja se nerijetko ostvaruje i na njegovim pjevalištim. Korištenje teške mehanizacije koja stvara

veliku buku prilikom sječe i izvoza šume, upotreba eksploziva prilikom vadenja panjeva stvara ambijent u kome veliki tetrijeb gubi svaku mogućnost produženja svoje vrste.

Broj odstrijeljenih tetrijeba na Smolinu je, prema mojim saznanjima, mali i gotovo da nije uticao na brojnost populacije. Razlog tome je oskudno znanje o bionomiji velikog tetrijeba kod većeg broja lovaca i njihova nezainteresovanost za lov na tetrijeba u odnosu na ostalu plemenitu divljač.

Imajući u vidu da je predstavnik našeg saveza na pomenutoj konferenciji iznio niz korisnih prijedloga za očuvanje tetrijeba, za očekivati je da će se u narednom periodu konačno pristupiti izradi dugoročnog plana za zaštitu velikog tetrijeba.

